

四庫全書

經部

按：本冊原書於抗戰播遷中曾遭水漬，致字跡模糊不清，茲雖力經描修版面，仍無法全復舊觀。

# 欽定四庫全書

經部

五禮通考卷十五

詳校官監察御史<sub>臣</sub>范宸

給事中<sub>臣</sub>溫常綬覆勘

總校官進士<sub>臣</sub>繆琪

校對官中書<sub>臣</sub>李棨

校對官中書<sub>臣</sub>徐步雲

謄錄監生<sub>臣</sub>王貽桂

謄錄監生<sub>臣</sub>沈安邦

欽定四庫全書

五禮通考卷十五

刑部尚書秦蕙田撰

吉禮十五

園丘祀天

宋史高宗本紀建炎二年冬十一月壬寅冬至祀昊天上帝於園丘以太祖配大赦

禮志建炎二年高宗至揚州庶事草創築壇於州南門

內江都縣之東南詔東京所屬官吏奉祭器大樂儀仗  
法物赴行在所 是歲冬至祀昊天上帝以太祖配

文獻通考高宗建炎二年詔行郊祀之禮冬至日合  
祭天上自常朝殿用細仗千三百有五人詣壇行  
禮

蕙田案建炎以來朝野雜記明云是年獨祭  
上帝通考既採之於後而此處反言合祭蓋  
徒見十三年以後俱合祭而不知是年實不

合也當以宋史紀志為正

樂志高宗建炎初國步尚難乃詔有司天帝地祇及他  
大祀先以時舉太常尋奏近已增募樂工千羽龔虞亦  
備始循舊禮用登歌樂舞其祀昊天上帝

降神用景安園鍾為宮一奏 蒐講上儀式修絜祀  
日吉辰良禮成樂備風馭雲旗聿來歆止嘉我馨德  
介茲繁祉

黃鍾為角一奏 我將我享涓選休成執事有恪惟

寅惟清樂既六變肅雍和鳴高高在上庶幾是聽

太簇為徵一奏 禮崇禋祀備物薦誠昭格宮昊明

德惟馨風馬雲車肝鬯居歆申錫無疆賚我思成

姑洗為羽一奏 惟天為大物始攸資恭承禋祀以

報以祈神不可度日監在茲有馨明德庶其格思

皇帝盥洗正安 靈承上帝厲意專精設洗於阼壘

水以清盥以致潔感通神明無遠弗届其饗茲誠

升壇正安 皇矣上帝神格無方一陽肇復典祀有

常旦登豐潔薦德馨香斐忱居歆降福穰穰

上帝位奠玉幣嘉安 治極發聞不瑕有芬嘉玉陳

幣神屆欣欣誠心昭著欽恭無文以妥以侑薦祐何

垠

太祖位奠幣定安 茫茫蒼穹孰知其紀精意潛通

雖遠而邇量幣薦誠有實斯篚睠然顧之永錫繁祉

皇帝還位正安 典祀有常昭事上帝奉以告虔逮

迄奠幣鐘鼓既設禮儀既備神之格思恭承貺賜

捧俎豐安

祀事孔明禮文惟楮爰潔犧牲載登俎

豆或肆或將無聲無臭精稷潛通永綏我后

上帝酌獻嘉安

氣萌黃鍾萬物資始欽若高宮吉

蠲時祀神筭泰元增授無已羣生熙熙亟蒙繁祉

太祖位酌獻英安

赫赫翼祖受命于天德邁三代

威加八埏陟配上帝明禋告虔流光垂裕于萬斯年

文舞退武舞進正安

大德曰生陰陽寒暑樂舞形

容千戚籥羽一弛一張退旅進旅神安樂之祉錫綿

字

亞終獻文安 惟聖普臨順皇之德典禮有彝享祀

不忒邊豆靜嘉降登盼飭神具醉止景貺咸集

徹豆肅安 內心齊誠外物蠲潔神來迪嘗俎豆既

徹燕及羣生靡或天闕降福穰穰時萬時億

送神景安 於赫上帝乘龍御天惟聖克事明饗斯

虔薦豆云徹靈焱且旋載錫休祉其惟有年

望燎正安 靈承上帝精意感通馨香旁達粢盛既

豐登降有儀祀備樂終神之聽之福祿來崇

高宗本紀紹興五年冬十一月戊寅郊

禮志紹興十二年臣僚言自南巡以來三歲之祀獨於明堂而郊天之禮未舉來歲乞行大禮詔建園壇於臨安府行宮東城之外自是凡六郊焉

高宗本紀紹興十三年春二月甲子製郊廟祭器三月丙午築園丘十一月庚申日南至合祀天地于園丘太祖太宗並配大赦

禮志紹興十三年太常寺言國朝圓壇在國之東南壇側建青城齋宮以備郊宿今宜於臨安府行宮東南修建於是遂詔臨安府及殿前司修建圓壇第一成縱廣七丈第二成縱廣一十二丈第三成縱廣一十七丈第四成縱廣二十二丈一十二陛每陛七十二級每成一十二級三壇第一壇去壇二十五步中壇去內壇外壇去中壇各半之燎壇方一丈高一丈二尺開上南出戶方六尺三出陛在壇南二十步丙地其青城及望祭殿

與行事陪祀官宿齋幕次並令絞縛更不修蓋先是張杓為京兆尹議築齋宮可一勞永逸宇文价曰陛下方經略河南今築青城是無中原也遂罷役

輿服志中興後以事天尚質屢詔郊壇不得建齋宮惟設幕屋而已其制架木而以葦為障上下四旁周以幄帟以象宮室謂之幕殿及行事又于壇所設大小次大小次之外又有望祭殿遇雨則行事于中東都時為瓦屋五間周圍重廊中興後惟設葦屋蓋倣清廟茅屋之

制也 紹興十三年禮部侍郎王賞等言郊祀大禮合  
依禮經皇帝服大裘被衮行禮據元豐詳定郊廟禮文  
何洵直議以黑繒創作大裘如衮惟領袖用黑羔乞如  
洵直議詔有司如祖宗舊制以羔製之禮部又言關西  
羊羔係天生黑色今有司涅白羔為之不中禮制不如  
權以繒代又元祐中有司欲為大裘度用百羔哲宗以  
為害物遂用黑繒請依太常所言從之遂以衮襲裘冕  
亦十二旒焉

蕙田案中興草創尚知議禮以袞襲裘可謂  
合先王之法服矣

文獻通考詔將來郊祀大禮排設大駕鹵簿仗內六引  
並郊廟合用祭器令禮兵部太常寺討論名件數目

據討論國初大駕儀仗總一萬一千二百二十二人  
今已有黃麾半仗二千四百八十三人玉輅腰小輿  
大輦逍遙子下一千九人外其金象革木輅芳亭鳳  
輦屬車寶輿一千二百七十三人天武捧日奉宸隊

六千四百五十七人仗內六引鼓吹前後部一千五百人其法物儀仗合用文繡以纈充代并郊祀天地宗廟從祀共七百七十一位用祭器簋豆簠簋罇壘禋杓鐙鉶鼎牛鼎羊鼎搏黍豆毛血盤幣篚匏爵坩盤匱壘洗爵盥坩飲福俎燭臺俎共九千二百五件太廟共五百九十六件內用銅玉者權以陶木代之至十六年始製造如政和之制

太常寺言大禮依儀前三日皇帝詣大慶殿宿齋前

二日皇帝服通天冠絳紗袍乘玉輅詣景靈宮聖祖  
天尊大帝前行禮差侍從官分詣元天大聖后并諸  
殿神御前行禮畢皇帝服通天冠絳紗袍乘玉輅詣  
太廟宿齋前一日皇帝詣太廟諸室前行禮畢皇帝  
服通天冠絳紗袍乘玉輅詣青城宿齋冬至日皇帝  
詣園壇行禮禮畢擇日恭謝景靈宮徧詣諸殿行禮  
從之既而禮部侍郎王賞言以行在街道與在京不  
同其詣景靈太廟權依四孟朝獻禮例服履袍乘輦

其後並同此制

禮部太常寺言修立郊祀大禮儀注

前祀十日質明誓戒有司設行事執事及陪祀文武官  
位于尚書省左僕射刑部尚書在北南向左僕射在左

刑部尚書在右

刑部尚書稍却

行事左僕射在南吏部戶部禮

部刑部尚書吏部禮部刑部侍郎押樂太常卿光祿卿

押樂太常丞光祿丞功臣獻官在其南

凡設光祿丞以下位皆稍却

次分獻官次執事官又于其南俱北向西上監察御史

位二在西東向北上讀冊舉冊官奉禮協律郎太祝郊

社太官令在東西向北上

奉禮郎以下位皆稍却

設陪祀文武百

官位于行事官之南又設行事執事及陪祀親王宗室

位于太廟齋坊右僕射刑部侍郎在北南向右僕射在

左刑部侍郎在右

刑部侍郎稍却

亞終獻在南北向西上親王

及行事執事陪祠宗室在東西向北上閣門御史臺太

常寺自下分引羣官各就位

凡將引行事執事陪祠文武官立班即御史臺引殿

中侍御史一員先入就位

左僕射讀誓于尚書省刑部尚書涖之右

僕射讀誓于太廟齋坊刑部侍郎泣之誓文曰今年十一月某日冬至至皇帝謁款于南郊合祭天地前二日朝獻景靈宮前一日朝享太廟各揚其職其或不恭國有常刑讀訖

內執事官奉禮郎以下文官宣敎郎以下武官從義郎以下先退餘官並對拜訖退

### 致齋

皇帝散齋七日于別殿致齋三日

一日于大慶殿一日于太廟一日于青城

凡散齋不吊喪問疾作樂有司不奏刑殺文書致齋日前後殿不視事唯行祀事前致齋一日儀鑾司帥其屬

鋪御座于大慶殿當中南向設東西房于御座之左右  
稍北又設西閣及齋室于殿後之左右殿上前楹施簾  
致齋之日質明有司陳平輦于垂拱殿庭文武百官俱  
就次各服其服閣門奏請皇帝未後詣齋室宣贊舍人  
等自下分引知樞密院事以下詣垂拱殿庭立以俟閣  
門附內侍進班齊牌垂拱殿簾降皇帝乘輦出至殿上  
少駐輦官迎駕自贊常起居宣輦官上殿簾捲鳴鞭行  
門禁衛諸班親從迎駕自贊常起居次舍人先贊知內

侍省官以下常起居次樞密以下通班常起居贊祇候  
引駕樞密知客省事以下至簽書閣門官分左右立應  
奉官祇應通侍大夫以下武功大夫以下並先退次管  
軍臣僚宣名常起居贊祇候引駕並分左右前道輦降  
東階垂拱殿門外禁衛諸班親從自贊常起居次行宮

御營巡檢一班常起居

如通侍大夫以下知客省事以下武功大夫以下知內侍兩省

帶御器械官充行宮使  
御營巡檢各歸本班

至大慶殿後閣

如步至大慶殿後閣臨時聽旨

降輦入西閣大慶殿簾降前道官並就次易朝服詣御

榻前分左右侍立

知樞密院事簽書樞密院事在東西向北上同知樞密院事在西東向侍

中一員在知樞密院事之北贊引閣門官一員又在其北並西向知客省事以下在簽書樞密院事之南稍東西向北上簽書知客省事以下又在其南稍却宣贊舍人等分引行事執事陪

祠文武官各緒結佩入詣大慶殿庭立班禮直官舍人引禮部侍郎奏請中嚴少頃又奏外辦符寶郎奉寶陳于御榻之左右皇帝服通天冠絳紗袍緒結佩出西閣乘輿稱警蹕侍衛如常儀由西房至御榻西降輿皇帝即御座南向侍臣夾侍贊拜閣門官于榻前贊樞密以

下拜殿之上下應在位官皆再拜

閤門官贊拜訖轉身北向隨拜訖面西贊

各祇候次禮直官引侍中詣御座前俛伏跪奏稱侍中臣

某言請皇帝降座就齋室奏訖俛伏興還侍立

凡侍中奏請準

此皇帝降座乘輿由東房入齋室侍臣各還所司直衛

者如常儀宣贊舍人分引行事執事陪祠文武官以次

出

三省親王樞密宗室起居問聖體並如閤門儀應行事執事陪祠官及從升

者並散齋七日宿于正寢致齋三日各宿于其次凡散

齋治事如故唯不吊喪問疾作樂判書刑殺文書決罰

罪人及與穢惡致齋之日官給酒饌唯祀事得行其餘  
悉禁與祀之官已齋而缺者通攝行事

奏告

前祀二日奏告太祖皇帝太宗皇帝室如常告之儀

陳設

前祀三日儀鸞司帥其屬設大次于外壇東門之內道  
北南向小次于午階之東西向又設文武侍臣次于大  
次之前隨地之宜行事陪祠官宗室及有司次于外壇

東門之外設東方南方客使次于文官之後西方北方客使次于武官之後設饌幔于內壝東門之外隨地之宜前祀二日郊社令帥其屬掃除壇之上下積柴于燎壇光祿牽牲詣祠所太常設登歌之樂于壇上稍南北向及設宮架于壇南內壝之外立舞表于鄼綴之間前祀一日太常設神位席太史設神位版昊天上帝位皇地祇位于壇上北方南向西上席以藁秸太祖皇帝位太宗皇帝位于壇上東方西向北上席以蒲越天皇大

帝五方帝大明夜明北極神州地祇十位于第一龕北  
斗天一太一帝座五星十二辰河漢等內官五行五岳  
神位六十有九于第二龕二十八宿等中官五鎮四海  
四瀆神位百七十有二于第三龕外官山林川澤邱陵  
墳衍原隰神位百五十有六于內壝之內衆星神位三  
百有六十于內壝之外第一龕席以藁秸餘以莞而席  
皆內向如太史之制

昊天上帝皇地祇配帝天皇大帝  
五方帝大明夜明北極神州地示

之座及禮神之玉俟告潔訖權徹其  
內官中官外官衆星等位皆設定

奉禮郎禮直官設

皇帝位版于壇下小次前西向飲福位于壇上午階之西北向望燎位于柴壇之北南向望瘞位于瘞坎之南北向設燿火二一于望燎位之東南一于望瘞位之西北

東西各二人

贊者設亞獻終獻位于小次之南稍東西向

大禮使左僕射又于其南行事吏部戶部禮部刑部尚

書吏部刑部侍郎光祿卿讀冊舉冊官光祿丞位于大

禮使之東

光祿丞稍却

奉禮郎太祝郊社太官令位于小次

之東北俱西向北上監察御史位二一于壇下午階之

西南一于子階西北協律郎二一于壇上樂虞西北一  
于宮架西北俱東向押樂太常丞于登歌樂虞北押樂  
太常卿于宮架北良醞令于酌罇所俱北向又設陪祠  
文武官位于執事官之南諸方客使在文官之南隨其  
方國光祿陳牲于東壇門外西向祝史各位于牲後太  
常設省牲位于牲西大禮使左僕射在南北向西上分  
獻官位于其後行事吏部戶部禮部刑部尚書吏部禮  
部刑部侍郎押樂太常卿光祿卿讀冊舉冊官押樂太

常丞光祿丞奉禮協律郎太祝郊社太官令在北南向

西上

凡設太常丞以下位皆稍却

監察御史在吏部尚書之西異位

稍却光祿陳禮饌于東壝門外道北南向太常設省饌

位版于禮饌之南大禮使左僕射在南北向西上分獻

官位于其後監察御史二俱在西東向北上行事吏部

戶部禮部刑部尚書吏部禮部刑部侍郎押樂太常卿

光祿卿讀冊舉冊官押樂太常丞光祿丞奉禮協律郎

太祝郊社太官令在東西向北上禮部帥其屬設祝冊

案于神位之右司尊彝帥其屬設玉幣籩于酌尊所次設籩豆簠簋之位正配位皆左二十有五籩右二十有五豆俱為四行俎二在籩前登一在籩豆間簠七簋七在籩豆外二俎間簠在左簋在右又設尊彝之位每位皆著尊二壺尊二皆有罍加勺罍為酌尊太尊二山尊二犧尊二象尊二皆有罍加罍設而不酌並在壇上稍南北向西上

配位設于正位酒尊之東每位皆有爵站

又設從祀諸神籩豆簠簋

之位第一龕每位皆左十籩右十豆俱為三行俎二在

籩豆前登一在籩豆間簋一簋一在二俎間簋在左簋

在右爵一在俎前加

內神州地祇加盤一在登之前

其餘神位每位

皆左二籩右二豆俎一在籩豆前簋一簋一在俎前簋

在左簋在右爵一次之登一在籩豆間

內五行五官五岳每位加盤一

在登之前并內壝外衆星位皆不設登

又設從祀尊站之位第一龕每龕

太尊二著尊二太尊在上第二龕每龕犧尊二象尊二

第三龕每龕象尊二壺尊二象尊在上內壝之內每階

概尊二內壝之外每階散尊二皆加勺罍在神位之左

又設正配位籩豆簠簋盤俎各一于饌幔內設進盤匝于壇下午階東南北向設進盤匝帨巾內侍立于皇帝版位之後分左右奉盤者北向奉匝及執巾者南向又設亞終獻盥洗爵洗于其位之南盥洗在東爵洗在西壘在洗東加勺篚在洗西南執壘篚者位于其後分獻官盥洗各于其方陞道之左壘篚各設于左右皆內向執壘篚者位其後祀日丑前五刻郊社令與太史官屬各服其服升壇設昊天上帝皇地祇太祖皇帝太宗皇

帝神位版于壇上又設天皇帝大帝五方帝大明夜明北

極神州地祇十位于第一龕太府卿師其屬入陳幣于

籩少府監陳玉各置于神位前

昊天上帝以蒼璧皇地祇以黃琮青帝以青珪

赤帝以赤璋黃帝以黃琮白帝以白琥黑帝以黝璜神州地祇以兩圭有邸日月以璧五岳以兩圭有邸皆盛于匣昊天上帝配帝幣皆以蒼皇地祇以黃日月內官以下各從其方色光祿卿師其屬入實

正配位籩豆簠簋

籩四行以右為上第一行糗餌在前粉簠次之第二行饗在前黃白黑形鹽膾

鮑魚鮪次之第三行乾棗在前濕棗栗濕桃乾桃濕梅乾榛榛實又次之第四行菱在前芡桌鹿脯又次之豆四行以左為上第一行醢食在前糝食次之第二行韭苴在前醢醢昌本廩藿菁苴鹿藿苴廩藿又次之第

三行葵菹在前羸醢脾析麋醢蜃蚘醢豚拍魚醢又次之第四行芹菹在前兔醢深蒲醢醢茆菹雁醢筍菹魚醢又次之簋實以稻梁粱在稻前簋實以黍稷稷在黍前登實以大羹

太官令帥其屬入

實俎

遵前之俎實以牛腥七體兩髀兩肩兩脅并脊兩髀在兩端兩肩兩脅次之脊在中豆右之俎二為

二重以北為上第一重實以牛腥腸胃肺離肺一在上端寸肺三次之腸三胃三又次之第二重實以牛熟腸胃肺其載如腥若配位即以東為上

良醢令帥其屬入實尊罍

著罍二一實玄酒一

實醴齊皇帝酌之壺罍二一實玄酒一實盞齊亞終獻酌之太罍二一實泛齊一實醴齊山罍二一實盞齊一

實醴齊犧罍二一實沈齊一實事酒象罍二一實昔酒一實清酒並設而不酌凡罍之實各視其罍又實

從祀神位之饌

第一龕每位遵三行以右為上第一行乾榛在前乾棗形鹽魚鱠次之第二行

鹿脯在前榛實乾桃次之第三行菱在前芡苴次之豆  
三行以左為上第一行芹苴在前筍苴葵苴菁苴次之  
第二行韭苴在前魚醢兔醢次之第三行豚拍在前鹿  
膾醢次之簋實以稻梁梁在稻前簋實以黍稷稷在  
黍前籩前之俎實以羊腥解一豆前之俎實以豕腥解  
一登實以太羹爵實以酒其餘諸神位每位左二籩  
在前鹿脯次之右二豆菁苴在前鹿膾次之簋實以稷  
簋實以黍俎實以羊豕腥肉登實以太羹爵實以酒神  
州地祇五行五官五

岳又實盤以毛血

又實從祀神位之罇

太罇實以泛齊犧罇實以

醴齊壺罇實以沈齊各以一罇實明水概罇實以清酒  
散罇實以昔酒各以一罇實玄酒著罇象罇俱實明水  
上帝配帝之饌升卯階  
其餘神位各由其階升  
太常設燭于神位前又設大禮

使以下行事執事官揖位于卯階之東內壝外如省牲

位

車駕詣青城

前祀一日皇帝于太廟朝享畢既還大次禮部郎中奏解嚴訖請皇帝入齋殿所司轉仗衛鹵簿陪祀文武官先赴圓壇青城齋宮導駕官以下就次各服其服有司進輿于齋殿乘黃令進玉輅于太廟櫺星門外東向于牛將軍一員執長刀立于輅前西向參知政事一員立于侍中之前贊者二人又立于其前少頃御史臺太常

寺閣門分引侍中參知政事太僕卿乘黃令詣大次門外立班北向東上乘黃令位其後次引導駕官以下在其後分東西相向立以俟奉迎前導次管軍臣僚又在

其後禮直官宣贊舍人引禮部侍郎奏中嚴

凡侍中參知政事禮

部侍郎奏請皆禮直官宣贊舍人引

少頃又奏外辦皇帝服通天冠絳紗

袍自齋殿詣大次行門禁衛諸班親從等諸司人員以下各自贊常起居次知客省事以下樞密都承旨以下知內侍省事以下帶御器械官應奉祇應通侍大夫以

下武功大夫以下及幹辦庫務文臣一班常起居俟皇

帝乘輿以出宣贊舍人贊侍中以下常起居次導駕官

常起居

已起居者止  
奏聖躬萬福

次管軍臣僚並常起居該宣名者

即宣名

若得旨免起  
居更不起居

皇帝乘輿以出稱警蹕侍衛如常

儀大僕卿出詣玉輅所攝衣而升正立執轡導駕官步

導皇帝至廟門外玉輅所侍中進當輿前俛伏跪奏侍

中臣某言請皇帝降輿升輅奏訖俛伏興退復位

凡侍  
中奏

請準  
此

千牛將軍前跪執轡乘黃令稍前進玉輅皇帝降

與升輅太僕卿立授綏導駕官分左右步導參知政事

進當輅前俛伏跪奏參知政事臣某言請車駕進發奏

訖俛伏興退復位

凡參知政事奏請準此

車駕動稱警蹕侍中先

詣侍臣上馬所以俟參知政事及贊者夾侍以出千牛

將軍夾輅而趨車駕將至侍臣上馬所參知政事奏請

車駕少駐勅侍臣上馬侍中前承旨退稱曰制可參知

政事傳制稱侍臣上馬贊者承傳勅侍臣上馬諸侍衛

之官各督其屬左右翊駕在黃麾內符寶郎奉八寶前

導殿中監後部從導駕官夾侍于前贊者在侍中參知政事之前侍臣上馬畢參知政事奏請車駕進發車駕稱警蹕不鳴鼓吹大駕鹵簿前導詣青城車駕將至青城閣門御史分引陪祠文武官宗室客使禮直官贊者引行事執事官俱詣泰禋門外立班再拜奉迎訖退

內有

已起居者止  
奏聖躬萬福

車駕及門少駐文武侍臣皆下馬導駕官

步導入門車駕動千牛將軍夾輅而趨至端誠殿前迴輅南向千牛將軍立于輅右侍中奏請皇帝降輅乘輿

有司進輿于輅後皇帝降輅乘輿入齋殿侍衛如常儀  
導駕步導至殿前皇帝降輿歸殿後閤簾降宣贊舍人  
承旨勅羣官各還次學士院以祝冊授通進司進御書  
訖付尚書禮部

省牲器

是日午後七刻去壇三百步禁行者未後二刻郊社令  
帥其屬埽除壇之上下司鐸彝帥府史及執事者以祭  
器入設于位

凡祭器皆藉以席  
籩豆又加巾蓋

太府卿少府監陳玉幣

于篚

告潔畢  
權徹

未後三刻禮直官贊者分引大禮使以下

詣東壩門外省牲位立定光祿卿丞與執事者牽牲就

位禮直官贊揖贊者引押樂太常卿入行樂架

凡亞終  
獻行事

皆禮直官太常博士引大禮使左僕射行事皆禮直官引餘官皆贊者引

次引禮部尚書升

自郊階視滌濯

凡行事執事官升降皆自郊階內應奉  
官并執事應奉人各隨應奉官階升降

次引左僕射申祇滌濯執事皆舉露白潔俱復位禮直

官稍前曰告潔畢請省牲次引禮部尚書侍郎稍前省

牲訖退復位次引光祿卿出班循牲一匝西向躬曰克

曰備次引光祿丞出班循牲一匝西向躬曰膾俱復位  
禮直官稍前曰省牲畢請就省饌位贊揖訖引大禮使  
以下就位立定禮直官贊揖所司省饌具畢禮直官贊  
省饌畢揖訖俱還齋所光祿卿丞及執事者以次牽牲  
詣厨授太官令次引禮部尚書詣厨省鼎鑊視濯漑協  
律郎展視樂器乃還齋所晡後一刻太官令帥宰人以  
鸞刀割牲祝史各取毛血實于盤俱置饌所遂烹牲郊  
社令帥其屬掃除壇之上下

奠玉幣

其日丑前五刻

行事用丑時七刻

諸祀官及陪祠之官各服其

服郊社令帥其屬入設神位席太史令帥其屬入設神

位版禮部帥其屬奠冊于案太府卿少府監入陳玉幣

光祿卿入實籩豆簠簋大官令人實俎良醢令入實罇

樂正帥工人二舞以次入與執罇壘篚冪者各就位次

引分獻官執事官各位于龕陞上下並外向次御史臺

太常寺及閣門宣贊舍人分引陪祀文武官及宗室客

使各入就位次禮直官贊者分引大禮使以下行事執事官就卯階內墻門外揖位立定禮直官贊揖訖次引監察御史案視壇之上下糾察不如儀者降階就位次引大禮使以下各入就位

皇帝行事

自青城齋殿服通天冠絳紗袍乘輿以出撞景鐘近侍及扈從之官導從至大次外皇帝降輿入次景鐘止簾降禮儀使樞密院官太常卿閣門官太常博士禮直官

分立于大次外之左右次引禮部侍郎詣大次前奏請  
中嚴少頃又奏外辦符寶郎奉寶陳于宮架之側隨地  
之宜禮儀使當次俛伏跪奏禮儀使具官臣某言請皇  
帝行事奏訖俛伏興還侍立

禮儀使奏  
禮畢準此

簾捲皇帝服大

裘袞冕以出侍衛如常儀禮儀使以下前導至中壝門  
外殿中監跪進大圭禮儀使奏請執大圭前導皇帝入

自正門

侍衛不應入  
者止于門外

協律郎跪俛伏舉麾興工鼓祝宮

架乾安之樂作

皇帝升降行止  
皆奏乾安之樂

至午階版位西向立偃

麾戛敔樂止

凡樂皆協律郎跪俛伏舉麾興鼓枹而後作偃麾戛敔而後止禮儀使以

下分左右侍立

凡行禮皆禮儀使樞密院官太常卿閤門官太常博士禮直官前導至位則分

立于左右禮儀使前奏有司謹具請行事宮架作景安之樂

文德之舞俟樂作三成止先引左僕射吏部尚書侍郎

升詣昊天上帝神位前立左僕射吏部尚書俱西向北

上侍郎東向樂作六成止郊社令升煙燔牲首瘞血禮

儀使奏請再拜皇帝再拜贊者曰拜在位官皆再拜內

侍取玉幣于篚立于樽所

應龕陞上下及壇內諸位太祝取玉幣亦各于樽所又

內侍各執盤匱帨巾以進宮架樂作禮儀使奏請皇帝  
搯大圭盥手內侍進盤匱沃水皇帝沃水又奏請帨手  
內侍進巾皇帝帨手訖又奏請皇帝執大圭樂止禮儀  
使前導

皇帝升壇

大禮使從

皇帝升降大禮使皆從  
左右侍衛量人數升

宮架樂作至壇下樂

止升自午階登歌樂作至壇上樂止登歌嘉安之樂作  
殿中監跪進鎮圭禮儀使奏搯大圭執鎮圭前導皇帝

詣昊天上帝神位前北向立內侍先設繅藉于地禮儀  
使奏請跪奠鎮圭于繅藉執大圭俛伏興又奏請搢大  
圭跪內侍加玉于幣以授吏部尚書吏部尚書以授左  
僕射左僕射西向跪以進禮儀使奏請受玉幣皇帝受  
奠訖吏部侍郎東向跪受以興進于昊天上帝神位前  
左僕射吏部尚書侍郎俱詣皇地祇神位前以俟禮儀  
使奏請執大圭俛伏興內侍取鎮圭授殿中監內侍又  
以繅藉詣皇地祇神位前先設繅藉于地禮儀奏請再

拜皇帝再拜訖樂止禮儀使前導皇帝詣皇地祇太祖

皇帝太宗皇帝神位前奠鎮圭玉幣並如上儀

皇地示位作嘉

安之樂太祖皇帝位作廣安之樂太宗皇帝位作化安之樂配位唯不奠玉皇帝東向受幣左僕射北向進幣

吏部侍郎左僕射吏部侍郎權于壇上稍西東向立吏

部尚書降階復位禮儀使前導皇帝還版位登歌樂作

內侍舉鎮圭繅藉以鎮圭授殿中監以授有司皇帝降

階樂止宮架樂作至版位西向立樂止初皇帝將奠配

位之幣贊者引分獻官俱詣盥洗位搯笏盥手悅手執

笏各由其階升詣諸從祀神位前各搢笏跪奠幣執笏  
俛伏興再拜祝史執事官各助奠訖退復位祝史奉毛  
血盤立于壝門外由其階升太祝迎于壇上俱進奠于  
神位前太祝與執事者退立于罇所

進熟

祀日有司陳鼎四于神厨各在鑊右太常令帥進饌者  
詣厨以七升牛于鑊實于一鼎

肩臂膈肱脰正脊一橫脊一長脇一短脇一代

脇一皆二骨以上正配位各一鼎

皆設局幕祝史對舉陳于饌幔內重

行西向以南為上光祿實簋豆簠簋于饌幔內

遵實以  
新養豆

實以糝食簋實  
以梁簋實以稷

次引禮部侍郎詣饌所視腥熟之節俟

皇帝升奠玉幣訖復位樂止引禮部尚書詣饌所執籩

豆簠簋以入戶部尚書詣饌所奉俎以入舉鼎太官令

引入正門宮架豐安之樂作設于外階之下北向西上

奉牲者在東祝史抽扃委于鼎右除罍初鼎序入有司

執匕畢及俎以從至外階下各設俎于鼎西匕畢加于

鼎太官令以匕升牛載于一俎

肩臂臑在上端肫膈在  
下端脊脇在中正配位

各一鼎先退祝史進徹毛血盤以次出次引禮部尚書

搢笏執籩豆簋簠戶部尚書搢笏奉俎以升執事者各  
迎于壇上禮部尚書奉籩豆簋簠詣昊天上帝神位前  
北向跪奠訖執笏俛伏興有司設籩于糗餌前豆于饔  
食前簋于稻前簠于黍前次引戶部尚書奉俎詣昊天  
上帝神位前北向跪奠訖執笏俛伏興有司設于豆前  
次詣皇地祇太祖皇帝太宗皇帝神位前配位並  
東向跪奠  
並如上儀樂止俱降復位太祝取菹擣于醢祭于豆間

三又取黍稷肺祭如初皆藉以茅各還罇所次引左僕射吏部侍郎升詣昊天上帝神位前左僕射西向吏部侍郎東向文引吏部侍郎詣皇帝版位前奉爵北向立內侍各執盤匱帨巾以進宮架樂作禮儀使奏請皇帝搯大圭盥手內侍進盤匱沃水皇帝盥手又奏請帨巾內侍進中皇帝帨手訖又奏請皇帝洗爵吏部侍郎進爵內侍沃水皇帝洗爵又奏請拭爵內侍進巾皇帝拭爵訖樂止又奏請執大圭吏部侍郎受爵奉爵升自午

階禮儀使奏請執大圭前導皇帝升壇宮架樂作至午  
階樂止升自午階登歌樂作至壇上樂止登歌禧安之  
樂作吏部侍郎奉爵詣昊天上帝酌罇所西向立執罇  
者舉霽良醞令酌著罇之醴齊訖先詣皇地祇罇所北  
向立禮儀使前導皇帝詣昊天上帝神位前北向立禮  
儀使奏請搢大圭跪吏部侍郎以爵授左僕射左僕射  
西向跪以進禮儀使奏請執爵皇帝執爵祭酒三祭于  
茅苴奠爵吏部侍郎以爵復于坵禮儀使奏請執大圭

俛伏興又奏請皇帝少立樂止左僕射吏部侍郎先詣  
皇地祇神位前西向立舉冊官搢笏跪舉祝冊讀冊官  
搢笏東向跪讀冊文訖奠冊各執笏興先詣皇地祇神  
位前東向立禮儀使奏請再拜皇帝再拜訖禮儀使前  
導皇帝詣皇地祇太祖皇帝太宗皇帝神位前酌獻並  
如上儀

皇地祇位作光安之樂太祖皇帝位作彰安之樂太宗皇帝位作能安之樂配位酌獻前導皇

帝東向受爵左僕射北向進爵吏部侍郎南向受爵復于北讀冊官南向讀冊文

左僕射以下

俱復位禮儀使前導皇帝還版位登歌樂作降階樂止

宮架樂作至版位西向立樂止禮儀使奏請還小次宮  
架樂作將至小次禮儀使奏請釋大主殿中監跪受大  
主皇帝入小次簾降樂止文舞退武舞進宮架正安之  
樂作舞者立定樂止

亞終獻

禮直官太常博士引亞獻詣盥洗位北向立搯笏盥手  
悅手執笏詣爵洗位北向立搯笏洗爵拭爵以授執事  
者執笏升詣昊天上帝酌罇所西向立宮架作正安之

樂武功之舞執事者以爵授亞獻亞獻搢笏跪執爵執  
樽者舉罍太官令酌壺樽之盎齊訖先詣皇地示酌樽  
所北向立亞獻以爵授執事者執笏興詣昊天上帝神  
位前北向搢笏跪執事者以爵授亞獻亞獻執爵祭酒  
三祭于茅苴奠爵執笏俛伏興少退北向再拜次詣皇  
地祇太祖皇帝太宗皇帝神位前酌獻並如上儀樂止  
降復位初亞獻行禮將畢次禮直官太常博士引終獻  
官詣洗及升壇酌獻並如亞獻之儀降復位初亞獻將

升次分引分獻官俱詣盥洗位搯笏盥手悅手執笏各由其階升詣從祀諸神位前俱搯笏跪執爵三祭酒奠爵執笏俛伏興再拜降復位

皇帝飲福

皇帝既奠玉幣有司以牛左臂一骨及長脇短脇俱二骨以並載于胙俎設于壇上酌罇所俟終獻既升獻次引戶禮部尚書搏黍太祝太官令升詣飲福位東向立奉俎豆及爵酒者各立于其後禮儀使奏請詣飲福位

簾捲出次宮架樂作殿中監跪進大主禮儀使奏請執  
大主前導皇帝詣飲福位升壇至午階樂止升自午階  
登歌樂作將至位樂止登歌禧安之樂作皇帝至飲福  
位北向立尚醞奉御執罇詣酌罇所良醞令酌上罇福  
酒合置一罇尚醞奉御奉罇詣飲福位殿中監奉爵尚  
醞奉御酌福酒殿中監西向捧以立禮儀使奏請再拜  
皇帝再拜殿中監跪以爵酒進禮儀使奏請搢大主跪  
受爵祭酒

三祭  
于地

啐酒奠爵殿中監跪受爵以興太祝帥

執事者持胙俎進減神位前正脊二骨橫脊二骨加于俎上內侍受俎以授戶部尚書西向跪以進皇帝受俎奠之戶部尚書乃受以興權退于壇上稍西東向立太官令取黍于簋搏以授太祝太祝受以豆東向跪進皇帝受豆奠之太祝乃受以興降復位次殿中監再跪以爵酒進禮儀使奏請再受爵飲福酒奠爵殿中監受虛爵興以授尚醞奉御執事者俱降復位禮儀使奏請執大圭俛伏興又奏請再拜皇帝再拜樂止禮儀使前導

皇帝還版位登歌樂作降階樂止宮架樂作至版位西  
向立樂止次引禮部尚書詣神位前徹籩豆次戶部尚  
書徹俎籩豆俎各一俱少移故處登歌熙安之樂作卒  
徹樂止禮部戶部尚書降復位禮直官曰賜胙行事陪  
祠官拜贊者承傳曰賜胙再拜在位官皆再拜送神宮  
架景安之樂作一成止

望燎望瘞

景安之樂畢禮儀使奏請詣望燎位前遵皇帝詣望燎

位宮架樂作至位南向立樂止初賜胙再拜訖郊社令以黍稷肺祭藉以白茅束之吏部侍郎帥太祝執籩進詣神位前取幣祝冊藉以茅大明夜明以上執事官並以俎載牲體黍稷飯爵酒各由其階降壇南行詣柴壇自南陞升以幣祝冊饌物置于燎柴諸太祝又以諸位幣帛從燎禮直官曰可燎舉燿火東西各以炬燎半柴禮儀使奏請詣望座位前道皇帝詣望座位宮架樂作至位北向立樂止吏部侍郎帥太祝執籩取幣祝冊藉

以茅五官以上執事官以俎載黍稷飯爵酒各從其階  
詣瘞坎置于坎祝史以諸位幣帛從瘞禮直官曰可瘞  
舉燿火寘土半坎

皇帝還大次

禮儀使奏禮畢前導皇帝還大次宮架樂作出中壝門  
外禮儀使奏請釋大圭殿中監跪受大圭以授有司侍  
衛如常儀皇帝至大次樂止禮部郎中奏解嚴次引大  
禮使以下詣外階之東內壝外揖位立禮直官贊禮畢

揖訖退次引陪祠文武官及宗室客使以次出將士不得輒離部位

端誠殿受賀

皇帝既還大次奏解嚴訖皇帝常服乘輿撞景鐘還青城侍衛如常儀鼓吹振作至殿前降輦還齋殿景鐘止閣門御史臺分引文武百官宗室並常服詣殿前立班稱賀閣門附內侍進班齊牌皇帝常服出升御座鳴鞭禁衛奏聖躬萬福次舍人揖管軍臣僚等并行門躬贊

再拜管軍臣僚以下皆再拜班首奏聖躬萬福次舍人引班首出班俛伏跪致詞訖俛伏興退復位舍人揖躬贊再拜管軍臣僚以下皆再拜三稱萬歲內侍詣御座前承旨退降階西向宣答訖舍人贊再拜管軍臣僚以下皆再拜三稱萬歲舍人贊各祇候管軍臣僚詣殿下侍立行門分左右立次太史局官詣當殿北向立舍人揖躬贊再拜太史局官再拜奏聖躬萬福出班躬身奏祥瑞訖退復位舍人揖躬贊再拜太史官再拜贊祇候

太史局官東出次舍人揖樞密以下躬舍人當殿通某  
官姓名以下起居稱賀轉身于班前西向立舍人贊再  
拜樞密以下皆再拜搢笏舞蹈三稱萬歲又再拜班首  
不離位奏聖躬萬福又再拜舍人引班首出班俛伏跪  
致詞訖俛伏興退復位舍人揖躬贊再拜樞密以下皆  
再拜搢笏舞蹈三稱萬歲又再拜閣門官當殿北向承  
旨退西向稱有制樞密以下皆再拜搢笏舞蹈三稱萬  
歲又再拜樞密直學士升殿侍立並升西階知客省事

以下下殿庭東侍立餘官分班出舍人禮直官揖宰臣以下躬舍人當殿通文武百官宰臣姓名以下起居稱

賀

三公通其官

舍人揖班首以下橫行北向立

學士待制兩省官將軍仍

舊相向立

稱賀一如上儀

唯典儀再拜樞密詣御座前承旨退詣折橫東稱有旨宣答

賀

訖宰臣執政官升殿東西相向立宰相執政官升東階參知政事升西階樞密直學士下殿餘官以次退皇帝降座鳴鞭殿上侍立官以次退

車駕還內

前期儀鸞司設御幄于太慶殿門外南向太常設宮架  
于行宮南門外稍南其日端誠殿受賀禮畢所司轉仗  
衛鹵簿于還途如來儀文武百官宗室客使先詣行宮  
南門外就次以俟立班奉迎乘黃令進金輅于端誠殿  
門外南向千牛將軍一員執長刀立于輅前有司進輿  
于齋殿導駕官俱詣齋殿奉迎禮部侍郎奏請中嚴少  
頃又奏外辦簾捲皇帝服通天冠絳紗袍乘輿以出應  
道導駕官等並迎駕奏聖躬萬福內祗應官贊謝再拜太

僕卿出詣金輅所攝衣而升正立執轡皇帝乘輿降自

西階至金輅所侍中奏請皇帝降輿升輅

有司仍具大輦若乘輦即

泰云降

太僕卿立授綬千牛將軍馭駕如來儀參知政

與乘輦

事奏請車駕進發車駕動稱警蹕侍衛如儀至侍臣上

馬所參知政事奏請車駕少駐勅侍臣上馬侍中前承

旨退稱曰制可參知政事傳制稱侍臣上馬贊者承旨

傳勅侍臣上馬參知政事奏請車駕進發車駕動稱警

蹕鼓吹及諸軍樂振作車駕將至行宮南門外文武百

官宗室客使並立班再拜奉迎次大內留守見再拜訖  
退車駕至行宮南門外少駐文武侍臣皆下馬步道千  
牛將軍立于輅右車駕動千牛將軍夾輅而趨樂正令  
奏采茨之樂入門樂止車駕至御幄前侍中奏請皇帝  
降輅乘輿若乘輦即奏  
云降輦乘輿皇帝降輅乘輿以入禮部郎中  
奏解嚴通事舍人承旨勅羣官各還次將士各還其所

景靈宮太廟儀注各見本  
門其後南郊行禮並如儀

麗正門肆赦

右前件郊祀儀注自誓戒至  
車駕還內見國朝會要獨缺

肆赦一條故取中興禮志所述補之然此乃臨安行都所行非京師承平時舊制也

前期儀鸞司帥其屬張設麗正門之内外又設御座于前楹當中南面又設御幄於後閣門設赦書儀物于御座之東設制案等于門下東壁又設雞竿于御街之東稍北太常設征鼓一于宮架之西稍北東向刑部大理寺臨安府以囚徒集于仗後質明文德殿內侍催班閣門引知閣門官以下御帶環衛官以下并諸管大內公

事行宮使御營巡檢及諸司祇應武功大夫以下一班  
面殿立次引管軍殿下東壁面西立閣門進班齊牌皇  
帝出宮行門禁衛等迎駕自奏聖躬萬福皇帝坐知閣  
門官以下御帶環衛官以下主管大內公事行宮使御  
營巡檢以下一班關班奏聖躬萬福次引管軍一班面  
殿奏聖躬萬福訖並出殿以俟導駕御史臺閣門太常  
寺先引宰臣以下百僚赴麗正門外分東西相向立班  
定閣門提點引百僚赴麗正門外東壁立班定皇帝自

殿上乘輦出樂人作樂導引至南宮門外俟皇帝升麗  
正門樂止引樞密使中書令升門于御座東面西侍立  
翰林學士升門于御座西面東侍立主管大內公事御  
帶環衛官門上西壁面東侍立知閤門官以下管軍行  
宮使御營巡檢門下東壁面西侍立至御幄降輦歸御  
幄簾降降出赦書閣門承接繫于仙鶴童子上門下進  
中嚴牌次進外辦牌並以紅絛引升門上知閤門官跪  
授禮部侍郎簾前進訖歸位簾捲大樂正令撞黃鐘之

鐘右五鐘皆應乾安之樂作內侍索扇扇合皇帝臨軒  
坐門下鳴鞭樂作簾內侍贊扇開樂止舍人閣門提點  
等分引百僚以下橫行北向立兩省官宗室遙郡以下  
依舊相向立典儀贊拜兩省分班東西相向立門下舍  
人詣樓前北向立門下中書令詣御前承旨並太常寺  
祇應臨軒稍東西向立宣奉勅立金雞舍人應喏趨至  
班南北向稍南至班東稱奉勅立金雞宣付所司退歸  
位金雞初立太常擊鼓每擊鼓投一杖四集鼓聲止初

宣立金雞即擊鼓立金雞訖即止更不投杖門下降赦  
書門下閣門承接置案上承受二人對捧于稍東舍人  
搢笏接捧案立知閣門官于案南北向虛揖直身立舍  
人捧案至樓前班心知閣門官北向虛揖直身立稱宣  
付門下省轉身稍西東向立引參知政事于案南北向  
搢笏跪閣門提點承受于案上捧制書授參知政事權  
與禮直官出笏俛伏興舍人捧案置于近東歸本班侍  
立知閣門官退歸侍立位參知政事捧制書北向俛伏

跪奏請付外施行伏興且躬身門下引中書令詣御前  
承旨訖西向宣曰制可門下參知政事直身立稱宣付  
三省退少西東向立引三省班首出班相向立各俛伏  
跪搢笏參知政事捧制書以授三省班首受訖並出笏  
俛伏興歸位付舍人舍人搢笏跪接訖直身立轉與閣  
門提點承受開拆訖却授舍人舍人行至班心近南面  
西折方訖北向立知閣門官并捧制書舍人于左省班  
後詣宣制位起居郎或起居舍人一員指摘句讀候旨

讀訖却歸本班舍人宣有制典儀贊拜百僚以下皆再拜舍人宣至咸赦除之獄吏奏脫枷訖應喏三呼萬歲奏聖躬萬福訖以罪人過宣制書訖門上舍人贊樞密使中書令翰林學士並賀兩拜門上閣門官不拜知閣門官并捧赦書舍人歸侍立位宣制舍人捧制書于三省班首前東向立搢笏跪以制書授三省班首三省班首接訖舍人出笏退歸侍立位禮直官引刑部尚書于三省班首前東向搢笏三省班首以制書授刑部尚書

刑部尚書受訖各出笏刑部尚書興以制書加于笏上  
轉與刑房錄事訖歸本班舍人閣門提點等分引百僚  
以下橫行北向立定典儀贊拜百僚以下皆再拜訖舍  
人引百僚出班俛伏跪致詞訖伏興歸位立典儀再拜  
百僚以下皆再拜搢笏舞蹈三呼萬歲又再拜知閣門  
官于門下面北躬承旨退稍東西向立稱有制典儀贊  
拜百僚以下皆再拜起躬身知閣門官宣答訖歸侍立  
位典儀贊拜百僚以下皆再拜搢笏舞蹈三呼萬歲又

再拜舍人閣門提點等分引百僚以下分東西相向並  
定門上禮直官引中書令詣御座前奏禮畢歸位內侍  
索扇扇合大樂正令撞蕤賓之鐘左五鐘皆應乾安之  
樂作簾降皇帝起還幄樂止門下鳴鞭舍人北向躬承  
旨四色官應喏舍人稱奉勅放仗百僚以下再拜退舍  
人宣勞將士訖退皇帝乘輦降門作樂導引至文德殿  
至殿上降輦樂止

建炎以來朝野雜記自元豐分南北郊至政和乃克

行之建炎二年上祀圜丘獨祭上帝而配以太祖用  
元豐禮也紹興十三年郊祀始設大神大示及太祖  
太宗配位自天地至從祀百神凡七百七十有一蓋  
元祐禮云

宋史高宗本紀紹興十六年十一月丙子合祀天地于  
圜丘大赦 十九年十一月壬辰合祀天地于圜丘大  
赦 二十二年十一月戊申合祀天地于圜丘大赦  
二十五年十一月癸亥合祀天地于圜丘大赦 二十

八年十一月己卯合祀天地于圜丘大赦

樂志紹興十三年初舉郊祀命學士院製宮廟朝獻及  
圜壇行禮登門肆赦樂章凡五十有八至二十八年以  
臣僚有請改定于是御製樂章十有三及徽宗元御製  
仁宗廟樂章一共十有四篇餘則分命大臣與兩制儒  
館之士一新撰述并懿節別廟樂曲凡七十有四俱彙  
見焉其祀圜丘

皇帝入中壇乾安 帝出于震巽惟齊明律曰姑洗

以示潔清我交于神蠲意必精既盥而往祈鑒斯誠  
降神景安 陽動黃宮日旋南極天門蕩蕩百神受  
職爰熙紫壇煥黃殊色神哉沛來蓋親有德

盥洗乾安 帝顧明德監于克誠齋戒滌濯式示潔  
清郊丘合祛享意必精既盥而薦熙事備成

升壇乾安 帝臨崇壇媪神其從稽古合祛並侑神  
宗升階奠玉誠意感通貺施鼎來受福無窮

昊天上帝位奠玉帛嘉安

御製

上穹昊天日星垂曜

照臨下土王國是保維玉與帛寅恭昭報永左右之  
欽若至道

皇地祇位奠玉幣嘉安

御製

至哉坤厚隤然止靜柔

載動植資始成性玉光幣色燦若其映式恭禋祀有  
邦之慶

太祖皇帝位奠玉幣廣安

御製

明明翼祖並侑泰壇

肇造綿宇王業孔艱表正封略上際下蟠躬以大報  
亦止于燔

太宗皇帝位奠玉幣化安

御製

赫赫巍巍及時純熙

昊天成命后則受之登邁邃古光被聲詩有幣陟配  
孫謀所貽

降壇乾安 躬展盛儀天步逡巡樂備禮交嘉玉既

陳神方安坐薦祉紛綸陟降有容皇心載勤

還位乾安 克昭王業命成昊天泰時禋燎八陞惟

圓肅然威儀登降周旋是謂精享神監吉蠲

奉俎豐安 至大惟天云何稱德展誠致薦牲用博

碩誠以牲寓帝繇誠格居歆降祥時萬時億

再詣盥洗乾安 帝出乎震巽惟潔齊神明其德迺

稱禋柴惟茲吉蠲昭事聿懷重盟而祀敷錫孔皆

再升壇與初升同惟易奠玉作奠酌

昊天上帝位酌獻禧安

御製

謁款壇陞祇祀泰禋丘

圓自然可格至神桂尊登酌嘉薦方新靡福菲眇敷

佑下民

皇地祇位酌獻光安

御製

厚德光大承元之明茲潛

華吹升于昭清冰天桂海咸資化成恭酌奠醪報本  
惟精

太祖皇帝位酌獻彰安

御製

於赫皇祖創業立極肅

肅靈命蕩蕩休德嘉觴精潔雅奏金石丕顯神謨惟  
後之則

太宗皇帝位酌獻韶安

御製

丕鑠帝宗復受天命羣

陰猶黷一戎大定奠鬯斯馨功歌在詠佑啟後人文  
軌蚤正

還位乾安 肆類上帝懷柔百神稟結既設珪幣既  
陳精誠潛交已事而竣佑我億載基圖日新

入小次乾安 恭展美報聿修上儀禮樂和節登降  
適宜德焉斯親神靡不娛海內承福式固邦基

文舞退武舞進正安 泰元尊臨富媪繁祉於皇祖  
宗既昭格止奏舞象功靈其有喜永言孝思盡善盡  
美

亞獻正安 陽丘其高神祇並位既奠厥玉既奉厥

醴亦有嘉德克相祕祀旨酒載酌以成熙事

終獻同上易再

酌為三酌

出小次位乾安

爰熙紫壇天地並貺來燕來寧畢

陳鬱鬯承神至尊精意所鄉告靈饗矣祉福其暢

詣飲福位乾安

帝臨崇壇媪神其從祖宗並歆福

祿攸同兵寢刑措時和歲豐其膺受之將施無窮

降壇

同上易將作以

飲福禧安

八音克諧降神出祇風馬雲車陟降在

茲錫我純嘏我應受之一人有慶燕及羣黎

還位乾安 帝出于震孝奏上儀燔燎羶臠神祿燕

娛肅若舊典罔或不祗既右饗之翕受蕃釐

徹豆熙安 燎鄉既升炳膋以潔于豆于登君蒿有

飮紫幄煩黃神其安悅將以慶成薄言盍徹

送神景安 九霄眇邈神不可求何以降之監德之

修三獻備成神不可留何以送之保天之休

望燎乾安 謂天蓋高陽嘘而生日月列宿皆天之

神肆求厥類與陽俱升視燎于壇以終其勤

望瘞乾安

謂地蓋厚陰翕而成社稷羣望皆地之

靈肆求厥類與陰俱凝視瘞于坎以終其勤

還大次乾安

舞具八佾樂備六成大矣孝熙厲志

專精已事而竣回軫還衡我應受之以莫不增

還內采茨

五輅鳴鑾八神警蹕天官景從莫不祇

栗祲威盛容昭哉祖述祚我無疆叶氣充溢

蕙田案三十一年當郊以金人渝盟而闕

五禮通考卷十五

欽定四庫全書

五禮通考卷十六

刑部尚書秦蕙田撰

吉禮十六

圜丘祀天

宋史孝宗本紀隆興二年二月丙子詔減文武官及百司吏郊賜之半七月庚子詔内外文武官年七十不請致仕者遇郊毋得蔭補十一月戊子以金人侵擾詔郊

祀改用明年十二月戊子詔郊祀大禮遵至道典故改用來年正月一日上辛

文獻通考孝宗隆興二年詔今歲冬至日當郊見上帝可令有司除事神儀物諸軍賞給依舊制外其乘輿服御及中外之費並從省約

太常少卿洪适言陛下盛德重華度越古昔初講郊禋之禮宜進昨慈闈並受帝祉乞下有司草具儀注進呈從之

禮部太常寺具上儀注

郊祀獻禮畢皇帝將詣飲

福位次贊者引光祿卿詣南壇門外幕次易常服次  
帥執事者入詣進胙幄內以所進胙設于腰輿匣內  
胙以牛腥體肩三臂二腍二次輦官擎腰輿進行光  
祿卿從至端誠殿上以腰輿隨地之宜置定輦官權  
于殿下立光祿卿以胙授進胙官進胙官受訖光祿  
卿以下先退次進胙官卽捧擎人擎腰輿入詣齋殿  
前以腰輿望德壽宮設定執事內侍鋪設褥位于其

後以俟皇帝還齋殿服履袍訖內侍官前導詣褥位  
執事內侍啟匣蓋內侍官奏請皇帝稍前躬視訖復  
位執事內侍封鎖匣訖奏請拜皇帝再拜訖掌表內  
侍以表授進胙官進胙官受表訖皇帝還齋殿次進  
胙官帥捧擎人擎腰輿以出至端誠殿上權置定輦  
官升殿捧擎降殿進行親從官援衛至奉裡門外進  
胙官騎從至德壽宮門外進胙官下馬後從以入至  
殿下置定以表并胙授德壽宮提舉官供進訖進胙

官以下乃退自後遇郊並如上儀

建炎以來朝野雜記隆興二年孝宗初行大禮時湯慶公思退為左相上問郊與明堂之費如何戶部尚書韓仲通曰郊之費倍於明堂侍郎錢靖禮言不過增二十萬若從祖宗故事一切從儉自宜大有減省上以為然乃詔除賞軍事神外並從省約其秋金虜入寇遂以明年正月辛亥朔旦行之上自宮徂郊乘玉輅用鹵簿之半禮畢乘平輦而歸乾道三年再郊

始復備五輅歸用大安輦焉

宋史孝宗本紀乾道元年春正月辛亥朔合祀天地于圜丘大赦改元

禮志孝宗隆興二年詔曰朕恭覽國史太祖乾德詔書有云務從省約無至勞煩仰見事天之誠愛民之仁所以垂萬世之統者在是今歲郊見可令有司除禮物軍賞其餘並從省約初降詔以十一月行事以冬至適在晦日以至道典故改用獻歲上辛遂改來年元為乾道

乃以正月一日有事南郊禮成進胙于德壽宮以牛腥  
體肩三臂二肫二導駕官自端誠殿簪花從駕至德壽  
宮上壽飲福稱賀陳設儀注並同上壽禮皇帝致詞曰  
皇帝臣某言享帝合宮受天純嘏臣某與百僚不勝大  
慶謹上千萬歲壽自後郊祀明堂進胙飲福並如上儀  
宗室傳令詠隆興初除同知大宗正事奏減郊祀賞  
給以助軍興詔褒之

孝宗本紀乾道三年十一月丙寅合祀天地于圜丘大

赦

李燾傳會慶節上壽在郊禮散齋內議權作樂燾言  
漢唐祀天地散齋四日致齋三日建隆初郊亦然自  
崇寧大觀法周禮祭天地故前十日受誓戒今既合  
祭宜復漢唐及建隆舊制庶幾兩得

六年十一月壬午合祀天地于圜丘大赦

蕙田案宋世例三年一郊此蓋以元年四年  
兩祭各後一年故此復先一年以正其期也

九年十一月戊戌合祀天地于圜丘大赦改明年為淳熙元年

淳熙三年十一月癸丑合祀天地于圜丘大赦十二年十一月辛丑合祀天地于圜丘大赦

蕙田案此祭之前缺二祭

林栗傳冬至有事南郊前期十日百執事聽誓戒會慶節有旨上壽不用樂迨宴金使乃有權用樂之命栗以為不可致書宰相不聽乃乞免充舉冊官以狀

申朝廷曰若聽樂則廢齋廢齋則不敢以祭祖宗二百年事天之禮今因一介行人而廢之天之可畏過於外夷遠矣不聽

趙雄傳金使入辭故事當用樂雄奏卜郊有日天子方齋樂不可用上難之遣中使諭雄雄奏金使必不敢不順即有他臣得引與就館上大喜

蕙田案二傳文不知的在何年總是孝宗時事故列于此意即一事而兩人各言之耳

光宗本紀紹熙二年十一月壬申合祭天地于圜丘以太祖太宗配大風雨不成禮而罷

禮志紹熙二年十一月郊以值雨行禮於望祭殿

寧宗本紀紹熙五年七月即位九月辛未合祭天地于圜丘大赦

慶元三年十一月甲辰祀天地于圜丘大赦

嘉泰三年九月詔南郊加祀感生帝太子庶子星宋星十一月乙亥祀天地于圜丘大赦

四年九月得四圭有邸玉一詔藏于太常

文獻通考寧宗嘉泰三年祕書省言看詳福州進士張容圖繳進南郊辨駁冊內太子庶子之星以謂皇儲未慶理宜加祀并宋星乃國朝受命之符興王之地及感生帝本朝條火德尤宜遵崇乞並特加祀于園丘容圖所陳數事實闕國體辭理可採乞下禮寺施行從之

五年臣僚言伏睹郊禋在即陛下祇奉神示其純誠固有以昭格矣而躬行盛德又自足以上當天心不

唯致敬於練日告虔之時也然臣以為一人致其精  
一於上必百官有司駮奔無射而不匱於下斯可以  
咸助聖德而潛通於眇冥自然神示降格而福祿之  
來下也周頌有曰濟濟多士秉文之德對越在天春  
秋傳曰有司一人不備其職不可以祭祭者薦其敬  
也薦其美也臣請得而詳陳之商人尚聲臭味未成  
滌蕩其聲樂三闋然後出迎牲聲音之號所以詔告  
於天地之間也此祭宗廟之文也而周家祀天祭地

奏黃鍾歌大呂奏太簇歌應鍾其為詔告於天地之間則一也樂工瞽師蓋聲音之所自出今登歌之樂列於壇上筵于上龕蓋上帝地祇太祖太宗並侑之側也而宮架之樂列于午階之下則百神之所同聽也夫樂莫尚於和平以平時羣祀言之絲竹管絃類有斷闕未知今復何似戛擊搏拊鼓吹侑舞之工蓋數百人宴人賤工安能蠲潔而無請繫名之人亦與其間垢穢擾雜殆不可辨此不可不嚴者一也周人

尚臭灌用鬱鬯臭陰達于淵泉灌以圭璋用玉氣也  
既灌然後迎牲蕭合黍稷臭陽達于牆屋故既奠然  
後炳蕭合羶薌此祭宗廟之文也而大雅所言卬盛  
于豆于豆于登其香始上帝居歆胡臭亶時毛氏  
曰木曰豆瓦曰登豆薦菹醢也登大羹也其求乎神  
之義則一也今自園壇之上暨于層龕之相承位列  
甚衆所謂籩豆簠簋登鉶罇俎之實內唯牲牢至期  
宰擊餘如臠鮑魚鱠與夫兔雁麋蜍之醢麋鹿之羶

其類甚不一也皆各司之所預造也餌饗醢醢黍稷  
稻粱之食芹筍之菹亦不一也則皆神厨至期之所  
造也竊聞預造者先後遲速或不能指指日分至有  
色惡臭惡之慮而先期呈饌之時或兩辰浹無乃太  
早而所供之物或不可用如醢醢之屬覆之瓦甌無  
復再察其可改換者未見倉卒而無復可察者不可  
得而措手矣蓋呈饌出于一時頃刻之間而預造之  
司吏卒習于鹵莽之素而有司掌之者不過一巡視

之而已百司狃于文具至於事神亦復無忌以至酒  
齊之設凡有數等京尹之司不過委之右選趨走之  
人其為醇醑既不可品嘗其不中度者甚多也氣臭  
之不嚴如此豈復有馨香之上達也哉矧又有最甚  
者名為供官殆百餘人祭之日凡籩豆簠簋登鉶罇  
俎之屬滌濯者此曹也籩豆簠簋登鉶罇俎之實鋪  
設者亦此曹也滌濯固已鹵莽而夜半設實於器皆  
其手所敷頓豈但簣蓐乾物之類而醢醢餌飽腥熟

酒齊之屬亦皆出于其手之所置竊聞此曹繫籍奉  
常平時所給微甚藍縷垢穢殆不可近而况執事之  
夕又復無所止宿半夜而興饋面濯手皆所不及也  
僅有漫漶之服以蒙其外而可使之供祭實乎至若  
贊引之人亦百餘輩進退于神位儀物之間上焉則  
切近于至尊次焉則隨逐於禮官平時亦皆供官之  
類耳以垢汙之人而蒙之以漫漶之服是皆不可進  
退于神位儀物之間者也此不可不嚴者二也昔魯

人之祭也日不足繼之以燭雖有彊力之容肅敬之心皆倦怠矣有司跛倚則為不敬之大今圜丘一龕之位通二龕三龕至壇埽之內外為位者八百分獻之官贊禮之人不能審候壇上疾徐之節但欲速于竣事獻官既多而禮生率常抽差六部寺監帥漕之貼吏為之既不閑習于禮而贊引捷給獻官跪拜俛興酌奠皆不及于禮端行無有而并行如奔其為怠慢甚矣此不可不嚴者三也夫三說如此正合汲汲

求所以整齊之臣愚以為天下之事一則治散則偷久則專暫則忽今郊禋大禮其百司所供之物所造之物各有攸司固不可不分任之也而提綱總要當出于一不然則禁之徒峻察之徒苛而下之便文逃責終不可得而究也奉常為九卿之長蓋統攝齊一之所自出況今郊禋大禮實又奉常之所掌乎臣前所陳登歌宮架之工奉常固自有籍矣其有請者若干人而尚不足用則未免以無請寄名者足之今名

為色長者當攷見絲竹管絃有無斷闕速行修補仍  
必拘集羣工洗沐澣濯存其衣裝之可者其有不整  
之人責限令其措辦可也今雖有澣濯之令而莫之  
遵奉也若其供官贊引之人垢弊已甚又非樂工之  
比已從御史臺行下奉常于一行人點名之外更加  
逐一檢察合用若干人除其間稍可備數之人自餘  
垢弊已甚必不可責其自辦者令奉常具申朝廷行  
下外祇備庫將先來檢計退下漫漶舊弊之物置造

衲衣一褐一褲先期發下奉常見名責領色長至期  
盡去其垢弊之衣而外襲之以法服表裏咸潔可以  
執事于籩豆簠簋登鉶罇俎之間而親近于宗嚴清  
肅之地矣若夫一行合干等人名數猥衆乞下臨安  
府令于便近慈雲等處闕報居民灑掃為備先期一  
夕令執色之人分就民居止宿夜半而興各齷面濯  
手整束衣服以趨祭所仍周環壇下約每十數步為  
置一盥悅俾供官禮生等人必先盥悅而後升壇所

是半夜鋪設亦乞于分獻官差劄內就令分頭躬親  
同供官逐位鋪設務令極其嚴潔一如法所設神  
厨雖已差官監造亦必奉常譏察之仍乞下臨安府  
大禮酒庫專差文官監造而預造之厨從所司亟撥  
人員徑過奉常躬親監造可也雖然今奉常之官朝  
廷分遣專一周旋檢察如升歌宮架之工預造近造  
之厨府屬所造之齊供官贊引之役察之必周令之  
必嚴皆歸于奉常而不至於散漫苟且而無及于事



守護者呵禁甚虔仰唯萬衆之尊郊禋大禮赫臨在  
下陛下嚴恭寅畏無一息之少間而又臨之以五使  
之重兢兢謹飭而百官有司顧循習舊弊不能凜然  
上承九重之意其可不亟正之以對越天地祖宗之  
威靈從之

宋史寧宗本紀嘉定五年十一月壬戌祀天地于圜丘  
大赦

樂志寧宗郊祀二十九首

皇帝入中壝乾安 合祀丘澤登侑祖宗顧諟惟精  
靈承惟恭有嚴皇儀有莊帝容監于克誠肅肅雍雍  
降神景安園鐘為宮 天門蕩蕩雲車陰陰百神咸  
秩三靈顧歆神哉來娛神哉溥臨饗時宋德翼翼小  
心

黃鍾為角 華蓋既動紫微洞開星樞周旋日車徘徊  
靈兮顧佐靈兮沛來載燕載娛式時壇垓

太族為徵 泰尊媪釐祖功宗德辰躔陪營嶽瀆受

職神哉來下神哉來格饗德惟馨留虞嘉席

姑洗為羽 金石宣昭羽旄紛綸潔火夕昭明水夜  
陳娛哉惟靈娛哉惟神風馬招搖惟德之親

皇帝盥洗乾安 皇帝儉勤盥用陶瓦禮神頌祇奠  
幣獻聿月鑑陰肅醴液融冶挹彼注茲禮無違者

升壇乾安 崇臺穹窿高靈下墮慶陰彷彿從坐  
峨宵昇于丘時通權火維天之命百祿是荷

降壇 帝饗于郊一精二純紫觚陟降嘉玉妥陳神

































